

# Poli'a Tesalonaika

## Vahe'mokizmi Anante (2)

### Avonkrezmi'nea Naneke

---

**1** <sup>1</sup>Nagra Poli'nagi Sailasi'ene Timotigata Tesalonaika mni'naza mono nagamota Anumza Nafatine, Ranti Jisasi Kraisinte tragotetma mni'nazamotarega, ama avona kre'neramunankino, <sup>2</sup>Anumza Nafatimofone, Ranti Jisasi Kraisi Asunku'zamo'ene rimpa fruzamo'a tamagrane mesie.

#### **Tesalonaika vahe'mo'za zmentintifina oti hanavetinaza zanku Poli'a susu huzmante'nea naneke**

<sup>3</sup>Nenfugata maka knama tamagriku'ma tagesa nentahita Anumzamofona susu hunentonazamo'a, e'i knare'zantfa hu'ne. Na'ankure tamagri tamentintimo'a rura huno nevigetma, magoke magokemotma ovesinte avesintema nehaza zamo'a hageno ra nehie. <sup>4</sup>E'ina hu'negu, tamentinti nehutma, maka tamazeri havizama nehazafine, knazama tamizafima kazikazi hutmaneaza zankura, Anumzamofono mono nagamofono amu'nompina tamagri tamagenkema nezamasamita, tamagrikura akaginerone.

<sup>5</sup>E'i ana maka'zamo'a Anumzamo'a fatgo refko zama'a erifore nehiankino, e'inahukna tamatazama e'neriza zampi Anumzamo'a tamazeri retro nehina, Anumzamofono kumara erigahaze. <sup>6</sup>Na'ankure Anumzamo fatgo zanke nehia Nekino, tamazeri havizama nehaza vahera, nona'a huno zmazeri haviza hugahie. <sup>7</sup>Hianagi Ramo Jisasi'ma monafintima hanavenentake ankeri vahe'anema, teve anefa'ane eama hanuno'a, Agra kanazampintira tamazeri o'za nehuno, tagri'ena knazantifintira eme tazeri o'za hugahie. <sup>8</sup>Hanki Anumzamofono ke'za antahiza nosuza, Ranti Jisasi Kraisi knare musenke novaririza vahera, nona'a huno knazana eme zamigahie. <sup>9</sup>Ama ana vahe'mo'za havi mizazami e'neriza, Ramofonteti'ene hanavenentake masa'afintira atre'za afete'are mni'ne'za, zamata erivava hugahaze. <sup>10</sup>Anazama fore'ma

haniana Ramoma ete esianknarera Agri vahe'ma mni'naza vahe'mo'zama ra agima nemisafina, tamagranena ana vahe amu'nompi maninetma, ra agi amigahaze. Na'ankure tagrama Agriku'ma huama hu'na kerera, tamagra tamentinti hu'naze.

**Poli'a Tesalonaika vahe'mo'za hankveti'za manisnagu  
Anumzamofa antahige'nea naneke**

<sup>11</sup>Anumzamo huhampri tamantenegeta tamagrikura nunamuna huneramantonankino, Anumzamofa tamazeri knare hina, Agri vahe manigahaze. Tagra nunamuna huvava nehunankino, Anumzamofa hanavemo'a tamaza nehina, maka knare'zama hunaku'ma nehaza zana nehuta, tamamentinti hutma hugahunema nehazazana hugahaze. <sup>12</sup>E'inahuma hanutma Ramofa Jisas Kraisi Agi erihentesga nehnageno, Anumzantine Ranti Jisas Kraisi'enena asunkuzama'areti tamagi erisaga hugahie.

**Kasege rutagre ne'mofa naneke**

**2** <sup>1</sup>Nerefugata Ranti Jisasi Kraisi'ma esigeta, Agranema tagrama ome atru hanuna zamofonkura, menina anage huta tagra tamantahinegone. <sup>2</sup>Mago'a vahe'mo'za tamasamiza Ramofa kna hago fore hu'ne hu'za tamasamisazo, mago vahe'mo huno Ruotge Avamumo e'inahu kasnampa kea nasamie huge, mago ke huama nehuno hanio, mago vahe'mo huno, e'inahukna avona hamprita konema hanageta, e'inahu kema antahisutma, antri nehutma ame hutma antahintahi tamifina antahigna osiho. <sup>3</sup>Atrenkeno mago kampintira vahe'mo'za reramatga osino, na'ankure ana kna fore osu'nenigeno, kote'zana rama'a vahe'mo'za Anumzamofona zamefi humitesageno, kasegema rutagre ne'mo'a efore nehina, ana ne'mofona azeri haviza hugahie. <sup>4</sup>Ana ne'mo'a agra'a maka'zama anumzane hu'za mono hunentaza'zane, mago'a mono hunentaza zantamina ha'renezmanteno, Nagra ra mni'noe huno Anumzamofa ra mono nompi trate nemnino, agra'a azeri ama huno Anumza mni'noe huno hugahie. <sup>5</sup>Tamagra ontahi'nazo, koma tamagranema mni'nena e'inahu vahera fore hugahie hu'na tamasaminoana? <sup>6</sup>Hagi menina nazamo kana rehiza huntene, tamagra antahi'naze, e'ina hu'neankino agra'a kna fatgore ana ne'mo'a eama hugahie. <sup>7</sup>Na'ankure kasegema rutagre hanavemo'a oku'a erizana ko e'neriankino, ana kama rehiza hu'nemofona azeri kami atretenkeno, kasegema rutagre ne'mo'a eama hugahie. <sup>8</sup>Anantera kasegema rutagre ne'mo'a eama hanigeno, Jisas'a agipinti zahonu huharafu huno ahenefrino, Agrama esia hihamu masa'amo, ana nera ahefri vgaregahie. <sup>9</sup>Anama hania ne'mo'a, Sata hanavereti hanavenentakezane, kaguvazane, havige avame'za erifore nehanigeno, <sup>10</sup>Anumzamofa

zamagu'ma vazisigu'ma tamage kema zami'neana, zamagra zamentintia osu atre'nazagu, Agra mika havige avu'ava zante'ma fananema hu kantema nevaza vahera rezamatga hugahie. <sup>11</sup>Na'ankure e'ina agafare Anumzamo'a antahintahizamia zamazeri savari hinke'za, havige zante zmentintia nehu'za, <sup>12</sup>tamage kerera zamentinti nosu'za, havi avu'avazama hu'zanku muse nehazankino, ana miko'mokizimia refko huzamanteno knazana zamigahie.

### Oti hanaveti zamofa naneke

<sup>13</sup>Hianagi tamagriku huta maka kna tagra Anumzamofona susu hunentone. Ramo'ma avesi'neramantea nenafugata e'se agafare Anumzamo'a tamagu'vazinaku huhampri' ramante'neankino, Avamuteti'ene tamage kerema tamentintima nehazageno, tamazeri ruotge hu'ne. <sup>14</sup>Tagrama knare musenkema huama hunazampi, Anumzamo'a tamavare kana retro higetma, Ranti Jisas Kraisi hihamu masazama'a e'nerize. <sup>15</sup>Ana hu'negu nenafugata avoma kreneramita, repima hurami'nona kerera azeri hanavetita oti hanavetiho. <sup>16</sup>Menina Ranti Jisasi Kraisine, Anumza Nafatimo, avesinerante'mo mani vava mani'zane, knare amuhazane asunkuzama'areti neramino, <sup>17</sup>tamazeri so'e nehuno, kema hanazano, maka knare erizama erisazana, tamagu'a tamazeri hanavetigahie.

### Poli'a nunamu hutesazegu Tesalonaika vahe zmantahige'nea naneke

**3** <sup>1</sup>Hanki huvigare nanekea, nenafugata nunamu hunerantenkeno, tamagripima hu'neazana huno Ramofo nanekemo'a, maka kokantega ame huno vuno e'no nehina, rahi amiho. <sup>2</sup>Ana nehanageno, tagrira fatgo osu vahe'ene havi vahepintira tahokeno tavregahie. Na'ankure zmagra maka'mo'za zamentinti osu vahe mni'naze. <sup>3</sup>Hianagi Ramo'a hugahuema haniaza hu'nekino, havi avu'avazama hu ne'moma tamazeri haviza huzankura kegva huramantegahie. <sup>4</sup>Tagra, tamagrikura hugahaze huta Ramofompina antahineramunankita, tamagrama nehazazana mago'ene nehutma, hihoma hutama huramante'nonazana hugahaze. <sup>5</sup>Ramo'a tamagrira Anumzamofa avesizana tamagu'afina eriamu nehina, Kraisi'ma hu'neaza hutma kazigazi hutma vugahaze.

<sup>6</sup>Menina nenafugata anage huta hanave kea neramasamune, Ranti Jisasi Kraisi agifina, erizama eri naneke repima hunezamunke'za novaririza, feru nemaniza tafuhe'ina zmatretma ogantu maniho. <sup>7</sup>Na'ankure tamagra antahinaze, tagrama repima hurami'nona avu'avazamofa negetma avaririho. Na'ankure tagra amu'nontamifima tavesrama osu, <sup>8</sup>magomofa bretia amanea erita o'nenonanki mizaseta neneta, tamagrira knama tamizankura maraguzatita hanine zgenena erizana e'nerune. <sup>9</sup>Hianagi tagra mago'a neza taminageta e'rinakura

nosunanagi, tagra knare tavutavama huza tamaveri hanunketma, tamagra ana tavu'tavaza avaririhogu nehune. <sup>10</sup>Na'ankure tamagranema manineta, amanahu avu'avaza hugahaze huta hanave kea tamasami'none. Mago vahe'mo'ma erizama e'orinakuma hania vahe'mo'a, nezana onegahie. <sup>11</sup>Na'ankure tagrama antahunana amu'rontamifina mago'amo'za erizana e'noriza, vahe'mofo zanku zamagenke nehu'za, eriza e'ori feru vahe nemanize. <sup>12</sup>Menina e'inahu vahe'mofona, Ramofo Jisas Kraisimpina hanavege huta zmazeri hanave'netita, akohe'za mni'ne'za zamagrazmi zamazampinti erizana eri'za, nomanizazmia retro hu'za maniho huta nehune. <sup>13</sup>Hianagi tamagra nerafugata, knare tamavu'tmavama huzankura tamavesra osino huta nehune. <sup>14</sup>Iza'o ama avompima kre'nona kemofoma amagama ontesimofona, anamofona kenhunetma, agranena tragoteta omaninkeno agra agazegu hino. <sup>15</sup>Hugahianagi, ha vahetamignara anamofona huonteho, hianagi nerafuga haviza hunane hutma azeri fatgo hiho.

#### **Poli'a huvgare ke hu'nea naneke**

<sup>16</sup>Menina rimpa fru Ramo, Agra'a maka knama hakare'zama hanafina, tamarimpa frua tamigahie. Ramo'a makamotane manisie. <sup>17</sup>Nagra'a Polina ama musenkea nazanko avona nentena, e'inahukna hu'na krenoankita kegahaze. <sup>18</sup>Rantimofo Jisasi Kraisi asunkuzamo'a makamotma tamagrane mesie.